

鈴

山

堂

集

鈴山堂集卷第二十九目錄

誌銘

南京大理寺卿孟公墓誌銘

南京大理寺卿傅公墓誌銘

前大理卿湯公墓誌銘

翰林院檢討易君墓誌銘

御史楚蒙黎君墓誌銘

廣西左布政使陳公墓誌銘

江西左布政使邢公墓誌銘

鈴山堂集卷第二十九

墓誌銘

南京大理寺卿孟公墓誌銘

公起家河南年二十三舉進士爲行人時公之內弟
何子仲默方有俊名與其群李獻吉王子衡崔子鍾
田勤甫及公日切劘爲文章揚摧風雅以相振發酒
食會聚婆娑酣嬉以相樂時稱十才子已而公選入
內臺爲御史即抗疏論劾當道大臣用是下詔獄謫
桂林郡學教授天下又皆高公之節而諸子者亦各
以氣節自著不獨稱才也公由桂林稍遷汶上知縣

嘉興府同知擢湖廣按察僉事持憲專決耻唯唯恭
遜意小拂即日挈舟徑歸引疾致仕嘉靖更化錄聞
廢諸賢乃起公山東僉事陞布政叅議陝西叅政拜
都察院右僉都御史巡撫寧夏尋改督儲南京公居
南京一日聞太夫人居家疾劇即解印馳歸或以職
守難之曰吾安能顧此耶會改公總理河道命下值
郊恩貤封躬捧冠帔至家踰四旬太夫人乃殂時論
謂公孝感所致云嗚呼士平居學問談理道至居位
臨事擇利害爲趣舍惴惴恒患失之考公所歷履無
直自遂邁往弗回志節可槩見所謂篤信好學者非

暇假令公履高位當大事其不爲惟性委懦獨特也
必矣是歲三月公服闋拜南京大理卿衆謂駸駸
用矣到官甫五十日遘疾遂不起則豈非命也夫其
可悲已公諱洋字望之姓孟氏生成化癸卯五月二
十三日卒嘉靖甲午七月二十五日年五十有二孟
氏其先金山人曾祖真童國初爲永平衛千戶祖勝
調信陽以功進指揮僉事故今爲信陽人考諱山贈
都察院右僉都御史母孫氏封太恭人配何氏封恭
人生子朴而天公居憂時以弟澤子祀爲後今側室
一子措方在抱於是一勝方娠也公其必有後乎公

坦易諒直與人交無諂容無詭辭居官務大體所至
聲色不動而績効畢著平生俸入以義散俱盡死之
日至無以爲斂方屬疾即以後事屬都憲顧公華玉
及通政林公懋易二公者日往問焉其終也視其斂
焉凡斂之具吾同年各出金爲賻留都諸卿皆賻焉
於斂之十日何恭人携其子自信陽馳至都憲馬公
敬臣則自淮具舟以歸公之喪將以某年月日葬何
恭人曰夫不幸不可俾遂泯泯無傳乃請于顧公述
狀而屬嵩爲銘嗟夫予曷忍不銘公哉銘曰
相古達人以死爲息孰爲短修悲也奚益嗟公德名

巍巍有立將明將昌胡奪之亟往寧爾丘永保終育

南京大理寺卿傅公墓誌銘

公以都察院右副都御史巡撫滇南既被命改南京大理卿當行矣尋甸武定土酋倡亂抄掠諸部圍逼會城勢張甚公曰吾可諉而去乎是時公已被疾乃力疾巡城發部兵以討賊賊尋破優詔嘉獎有白金綺幣寶鏹之錫公經理條畫起居無時既行至鎮遠則疾甚弗起嘉靖戊子五月廿一日也年六十有七計聞詔有司營塋事遣官諭祭如制公少刻苦爲學家貧寄食京師以羽林戎籍補順天府學生領京闈

鄉薦丙辰登進士授大理評事詳識不私遷寺副繼
遷寺正奉命慮囚于河南再泄湖廣多所平反逆瑾
擅政嘗欲脫人于罪公持弗可瑾怒中以他事逮公
繫詔獄謫浙江布政司理問已而復逮至京禍出叵
測或勸可賄免者公委順守正一無所移人咸危之
然公居官素防檢密無可指撫瑾終莫能害也擢山
西按察僉事陝西兵備副使調廣西右江有平賊功
進俸一級陞貴州叅政陟察使廣西右布政使雲南
左布政使拜都憲即撫其地公所爲政拊罷察之選
按貪暴之吏前後數任皆在邊方勞効畢著比及內

召而公弗祿矣公諱習字本學姓傅氏南昌進賢人
曾祖諱原益仕爲廣西太平知府祖諱德威父諱明
昌以公初命贈爲大理評事公娶萬氏封孺人二男
子縝守忠皆縣學生女一適府學生熊梅孫男囁孫
女二長適黃墨次許聘太守萬公鉉之孫拭傅與萬
世爲婚姻守忠今南臺總憲治齋公壻也公之卒也
惟守忠在側扶柩歸與其兄以某年月日葬公李坡
橋山之陽而來金陵以求予銘嗚呼公起諸生徒步
宦學屢踐艱棘終以就立顯庸于時庶幾堅忍果毅
致遠受大者矣乃論次行事而銘之銘曰

維傳之先說相有殷克邁種德代襲其芬公奮自田
啓蹟羈旅文優以仕若契而取奸人擅朝重足屏息
率其方剛威我弗惕旬宣列省績美具稱書載俊乂
詩詠國禎大卿既命亟務穰起勛亂削平惟義之濟
鞠躬盡瘁奄忽殂終裏尸萬里孰謂非忠刻銘于幽
善履孔最以告後人傳氏之隧

前大理卿湯公墓誌銘

六年夏晉有疑獄天子下三法司集議群臣連奏
讞不稱上旨皆坐免官時大理卿湯公與在遣中
外之
上意明羣臣無他漸次召復而臺諫部使爭

言湯公賢宜復用章凡數十上公里居六載嘉靖十一年八月二十九日竟以疾卒春秋七十有三云又三年乙未正月十二日葬于邑故山之原公仕而廉雖踐大卿無厚蓄以故久弗克葬其葬也禮弗克備其孫世賢謀于叔父雨曰葬宜有銘以昭德垂遠可弗圖諸乃以其姻張太史袞所述狀以來請銘公諱沐字新之姓湯氏常州江陰人也幼時讀書學文不假強教舉成化丙午鄉薦第六人弘治丙辰登進士第選爲崇德令其爲政威惠信著吏急民寬袞延庠校風移化行比其去民思之爲其立祠其召爲監察

御史舉彈無所避其陞湖廣按察僉事既行矣逆瑾方擅政怒不已附復斥爲武義令瑾敗起爲廣東僉事督理鹽課湔剔挾摩宿弊澄革遷福建副使當朝覲故相楊公一清柄銓衡舉天下方面治績超最才可大用者數人疏請表異公召列陞江西按察使浙江廣東左右布政使拜都察院右副都御史巡撫貴州改巡撫四川芒部寇亂治軍行師謀慮精審地方底平璽書勞美賜白金彩幣召掌廷尉公安貌凝重吏治精達任公竭節議法處令爭棘不撓上方篤于委任顧以一眚廢則所謂命也非歟公歸屏居

城南野服課農訢訢自適邦大夫見語不及私見不
善中疾之若將浼焉即面不忍顯白人更稱長厚微
時所識被褐蓬藿之賤必俯問其廬姻黨旅會視毛
燕坐汲引後進勸飭指誨惟恐弗及公素彊無疾方
被疾度不能起親治後事甚悉猶口諷三詩以國恩
未報爲恨曾祖諱真隱德弗仕祖諱鏞父諱虞並以
公貴贈都察院右副都御史母胡氏贈淑人元配陳
氏贈淑人先公二十年卒公終身不復娶旁無媵侍
焉子男二長雲七品散官先卒次雨太學生女適義
官周都孫男二世賢適長承重次世勛三孫女適夏

尚綱何應期朱仲曾曾孫一舟公內外行完崇約惕
盈施於有家榜其堂曰知艱自爲文遺世賢曰守此
足以保躬矣世賢蔭補國子好學而文予所教諸生
也以公遺命請予爲銘銘曰

惟昔江陰仕鮮顯榮八座登朝奮始自公惟公之興
莫匪躬致德立位來若契而取終焉奄躋失署亡資
衆論則歸豈足瑕疵考其初終淑善可儀天不憖遺
君子之悲庶以檢已儉以師後公名不忘世以永紹

翰林院檢討易君墓誌銘

君長沙攸縣人易氏諱舒誥字欽之弘治乙丑進士

選爲翰林庶吉士三年授國史檢討君始業進士不
工爲古文辭既入翰林始盡棄其前所學慨然慕古
人所爲而力追之取左氏先秦西漢之書晝誦夜思
鉤玄致隱沈浸酣鬱久之於文大有得也爲詩妙悟
超詣上逼晉唐而書體尤工由是名譽暴耀振發聞
海內儕輩屈伏莫與之京矣蓋君所自力者如此爲
檢討踰年以忤逆瑾意調南京戶部主事瑾誅乃復
爲檢討謁告歸省念二親年高留侍不忍去卧家十
有四年絕意榮利隱操沉靖臺臣部使交章薦之既
而居親之喪將釋服人以謂君自是可出而仕且顯

用矣竟以嘉靖丙戌十二月十三日寢疾終于家年五十有二云嗚呼天之生夫人也既畀之才矣而不副之以須臾之壽使少待以酬斯人之望竟何意哉竟何意哉予往歲奉使桂林與君會南嶽下今少宰南川張先生時督學湖南適偕會留憩浹旬窮嶽之勝而別余三人者同爲庶吉相好也及予桂林還則又問道于攸攀磴緣崖歷險遠以造君之廬欵語再宿乃別然孰意自此而訣也悲夫君嘗生二男子皆殤卒以無嗣今治君之墓而來請銘者壻陳惟健也

曾祖諱耀祖諱顯考諱萬福贈如君之官母劉氏配

蕭氏封皆孺人君卒之明年十二月二十八日葬於
母墳高山之陽以蕭孺人祔銘曰

蹇于仕不熬施以年而且無子嗚呼欽之行過乎古
人而文高乎當世其傳在此抑又奚悲邪

御史楚蒙黎君墓誌銘

世所稱以謂難得者精明博洽強幹之才既得之矣
遭時純熙居可爲之地奮庸效績致君子理而澤加
於生民豈非士者所願哉然是數者恒患於莫能兼
夫時難得而易失也名難成而易毀也用舍易遇愛
憎殊好是故雖有難得之才而罕究其用或連蹇弗

遂以沒此有志之士所深以爲惜也黎君諱鳳字乾
兆自爲諸生博學工文詞已有俊名舉弘治丙辰進
士授行人拜河南道監察御史當是時孝宗皇帝
御天下圖惟治理獎寵臺諫君感激自效論諍諤
無所避明習吏治事至能洞燭顛末長憲者有大事
必召君議君操牘書奏援据古義傳以文法時出新
意以佐其說橫貫超絕儕輩莫能及也及出按南畿
剔姦振弊發擿隱伏有豪右武斷根節盤固更數政
莫能治君至即寘于法威震遠邇尋改督南畿學政
掄材造士人稱公允蓋君遭時行志要欲邁往自樹

慕古名人所爲而才克濟之無何正德之初權姦柄
國挾宿憾竟假考察斥君歸矣嗟乎天之生夫人也
而命之如此吾不知其何如也君旣歸學士大夫惜
君者多擬薦之然格於例終莫之遂君惟自放於山
泉雲石間卜居古城構蒙耕之堂日引親舊觴對爲
樂或時慷慨謳吟紆其所懷語及弘治間事未嘗不
觸觸感惻畫然以悲云君世家新喻北蒙山下學者
稱爲楚蒙先生所著有蒙耕錄奏議詳刑諸藁藏于
家曾祖諱敏才祖諱明啓考諱紹魁贈如君之官母
劉氏封太孺人君兄弟五人其季曰龍乾德踵君舉

進士爲御史至廣西按察副使君初娶敖氏繼李氏
贈封皆孺人子曰天監邑學生子賢也君生成化乙
酉六月十一日卒嘉靖丁亥十一月廿四日得年六
十有三以卒之三年庚寅月日葬祔祖里冷塘先御
史府君之墓左君嘗囑其子曰吾裏罕人知脫不諱
當求汝外舅銘吾葬至是天監奉遺命以請嗚呼予
尚忍銘君也哉然眉忍不銘乃書之庶幾以識予之
悲而慰君於地下銘曰

嗚呼君何歸乎茫乎昧乎其神曷之而形返茲土惟
耕在蒙惟墓在祖尚永其承以受多祜

廣西左布政使陳公墓誌

中奉大夫廣西左布政使陳公墓誌
嘉靖乙酉四月十七日卒於南昌之里第塋新建縣之觀音山越六年
辛卯正月二十二日夫人彭氏卒于其子刑部主事
冠之官舍而冠扶柩歸以是年月日與公合塋乃來
求文以作公碑謹按大夫公諱奎字文表始為諸生
學成久弗試部使以年例黜之或曰名士可失乎復
之遂領省薦登弘治己未進士除廣濟知縣為縣有
名召為監察御史時逆瑾用事公往覈甘肅邊儲忤
瑾意撫公微過逮赴詔獄久之得白擢山西按察副

使河南按察使山東右布政使廣西左使凡仕二十四年其行事可紀者衆矣在廣濟廉正率僚屬戒私謁俗號嚚訟常伺吏得失爲傾陷計公治其桀黠者數人群黨爲戢刊諭俗之文教民行冠婚諸禮改作廟學買民地以廣黌舍淫藝相勤學者由是日起歲大侵貽書富民咸願出宿峙助賑全活甚衆罪贖所入至瓜代粟積不下數萬邑人銘其政于石在御史論事無所避出按廣西風采整峻監臨試事稱得士在山西築城南關工費甚鉅公規畫有方城成汾河大決將逼城民惶擾不知所爲時方歲凶公出廩粟

二千七百有奇募貧氓計口日給令濬河導流由故道城得不滅而餓者亦賴以賑屢殄劇寇而不任其功公前後所歷皆憲職慎於刑獄精斷明恕竄正吏牘運筆如流吏抱案植立不得出一語屢獻大辟可疑者率破械釋之而姦賊之吏則按劾無少貸蓋公施於政者如此然以性執直不能隨世俯仰爲貴要所忌獲不根之謗言者論公前在河南嘗爲逆藩市馬朝廷下所司考驗無幾微實跡雖事枉得白而公已倦且休矣屬疾方劇冠適奉使南方間道歸侍公無他語但敕以守官報國葬制從儉而已夫人新建

右族有純行內外稱賢子一人即刑部冠也女適上
舍生方侃子一桂孫男三曰賜曰貺曰貽陳氏之先
爲江州人後徙吉水五世祖天錫徙南昌天錫生子
隆子隆生銘銘生聰浙江餘姚縣簿公之考也贈爲
監察御史嵩聞諸君子之論曰大夫公飭已厲行期
自樹遇事敢往有爲乃一遭污蔑卒黜抑終其身惜
哉嗟夫愛憎異情則譽毀易論今之士其不幸而蒙
此者亦多矣豈獨公哉論次終始作爲銘詩庶幾以
詒於後世銘曰

仕既孔材兮克奮于時端厥銜策兮周道以馳前無

禦者兮後忽忌之我脩不苟兮有殫緇吁
兮銘以余辭

中奉大夫江西左布政使致仕邢公墓誌

嘉靖壬辰夏六月三湖先生邢公卒于當塗之私第
其年冬十一月塋高淳之花華岡子鄉貢士埴進士
址以予舊嘗知公來請銘予曰昔在已卯豫章之變
公等合謀舉義大難以夷厥功偉矣顧抑於吏議公
於老三湖材用弗究君子惜焉論次公之行事以顯
公之來禩其誰曰不宜謹按邢氏其先河間人有諱弼
從家當塗湖陽寔始祖也曾祖諱震祖諱純皆不

仕考諱愚贈南京刑部主事公諱珣字子用始舉進士授南京戶部主事改刑部轉員外郎郎中復改戶部忤逆瑾褫職爲民瑾敗復起除工部前後皆職留署名稱蔚起擢知贑州府事壤接閩廣嶺嶠險絕多盜有劇盜滿總等公推誠諭撫之率衆來降授以廬舍給牛種俾居耕豐其犒賜他盜起乃藉以禦盜修古鄉社約大新學宮飭周元公趙清獻之祠文教事興焉正德丁丑南安龍川群盜雲擾據橫水岡左溪諸峒時調楚兵來征公爲設方略督士衆悉擣平之已卯逆濠遣使齎重貲誘滿總兵爲助滿執使者

十公公曰吾國練兵集換待之爾其云何皆頓首
自勅時都御史王公守仁知府伍公文定起義吉安
公即日部兵來會次樟樹鎮時徵諸郡兵尚未至公
曰賊雖出城虞我師掩其後逗留不前今須馳據南
昌否則賊兵還復入城猝難攻矣乃即拔兵三日夜
抵南昌諸兵入城縱殺公白王公出令禁之軍乃定
濠至安慶聞城破復還屯黃石渡距我師時伍公兵
爲前哨始交鋒失利公倉皇馳援親執旗麾兵進刺
其渠帥追斬數十人賊勢稍却諸兵對江而陣時南
風甚疾公遙望賊在下流舟相尾曰是不可用赤壁

策乎即絙葦灌油罕小舟薄之炬舉風迫烟焰蔽天
賊亂溺死相枕藉濠遂成擒事聞詔即陞公江西右
叅政時城新破民物創痍又澤水爲災二三巨璫屯
兵久駐食暴加慘公拊循經畫勞甚今上登極首
議賞格言者謂公等縱部兵殺掠太多議久不決公
亦屢疏乞休乃詔陞公左布政使致仕公歸口不言
功有問者亦不荅也杜門坑經史自樂修家譜買田
置義倉以濟族人之貧外墓久湮者各表石識之公
性剛介寡合然遇人以誠有君子長者之度焉爲文
章典實精確所著采芹餘興北行紀事秋臺小記憂

居歸間二錄水曹日記章貢雜錄江藩隨筆歸田野
語藏于家生天順壬午七月十七日享年七十有一
配安人楊氏子五長璧次埴次址次坊次莊府學生
女一嫁士人劉輅銘曰

維古郡國民兵是職于以附衆于以威敵今之邦侯
壤地攸似簿書其營建卹武事顯允邢公奮起于時
文治武功式克蕪之虔萃寇區桴鼓數起撫順摧寇
所向披靡惟公之謀決勝制奇渤海潁川芬烈與夷
漢渙不道亂我天常我致其身義旅肅將赤旗陽陽
軍于黃石煙塵晝冥電掃霆擊惟公之忠毅形於色

革其勳勳以定反側天眷聖明宸極有歸江漢廓
清天日澄暉惟天生賢是以資世平國大難若儲而
俟帝曰休哉惟爾膚功何以報之嶽伯之崇公則
來歸角巾私第避寵辭榮人孰我忌惟其名德福祉
優優永世弗忘紀石茲丘

歸山堂集卷第三十目錄

誌銘

參議符公墓誌銘

朝列大夫浙江布政司參議徐君墓誌銘

贈奉政大夫浙江按察司僉事朱公墓誌銘

奉政大夫福建按察司僉事伍公墓誌銘

南京守備晏公墓誌銘

知府馬公墓誌銘

知州郭君墓誌銘

鈴山堂集卷第三十

誌銘

參議符公墓誌銘

公少刻厲讀書寄食城北浮屠足不踰戶閭數年學
斐天進以禮經占弘治乙酉江西鄉試明年舉進士
南省第五人選知溧陽縣法古爲政諭民重禮敦俗
省勞農田濬築陂渠潴洩以時旱潦有備鉏止豪右
屢察疑獄脫數人於死徭役編審有法吏不得爲姦
修學舍祠名宦鄉賢立貞女廟作義阡遷葬八十餘
塚溧人鐫石頌焉陞高州同知丁父憂服除補辰州

改作黔江澈浦二學以乘山川之秀召吏民子弟親
爲講說誘勸以文藝學者日起正德己巳擢爲廣西
按察僉事分巡左江會監賊構亂一日謀報賊衆分
攻平南貴桂三邑公即督兵馳至平南江伺賊半渡
擊之斫其渠魁中流渰沒不計其數自始發兵及後
賊所以破滅皆如公計衆謂公儒者料敵制勝乃爾
潯衛將有與卒訟田而久不決以危言脅公不爲動
竟質平焉潯民奏田少稅多期得減賦公曰必使田
浮則欺上必使稅浮則損下當驗實使田賦兩平耳
已而田果不少衆帖服公乘險阻冒瘴癘經畧勦

既陞浙江參議旋改山東皆不往請老而歸蓋公
爲政志在便民有所建置期必行雖忤上官意不少
恤不能効世吏飭厨傳將迎所至有聲蹟而貴勢多
不合以此淹久無助庠之裕如也公不苟取予在漂
陽於廨後得古藏銀悉易穀以賑貧民居家盈縮無
所問家人時以匱告徐曰若等自經理之可矣杜門
脫物十有八年足跡不一至城府提學使者請主白
鹿書院亦以疾辭朔望謁先祠坐堂上率家衆道古
今孝友節義定規約數十事俾世守之公於書無所
不觀自經史子集至於天文星曆地里醫卜罔不研

究手自鈔錄垂老不輟其於學大有得也所著有活
溪存藁若干卷選唐宋元國朝近體詩歐蘇文選醫
家纂要地理集奇諸書藏于家公諱觀字衍觀學者
稱爲活溪先生姓符氏世家新喻之金田祖諱剛考
諱勤皆鄉里長者考以公故贈溧陽知縣公生正統
甲子八月十八日享年八十有五嘉靖戊子九月三
日卒配張孺人先卒塋潁江之南楊家寨卜以卒之
明年月日啓壙而合葬焉二男子錫銑也錫好學以
文藝著稱通判韶州徵爲太常典簿至是錫奉狀拜
泣請予銘公之墓予觀士大夫能學不厭及仕號爲

廉靜謹潔不爲利疚雖處隱約不以爲悔風範行誼足儀鄉里後進者吾唯知公而已論次其世而系以銘非獨慰其子乃亦以詒於今之士銘曰

符公樸迂貌也癯家食無儲富藏書爲吏淹徐耻競趨威行惠濡弊以祛歸老一廬靜恬愉惟學忘劬行璠璣鏡石埋詞賁幽墟

朝列大夫浙江布政司參議徐君墓誌銘

君姓徐氏諱璠信之其字也十歲能屬文倪文僖公一見奇之謂其叔祖助教公曰徐氏有子矣受叔父僉憲公訓學益進弘治庚戌登進士第觀政戶部嘗

攝監收倉粟能革諸弊給賞遼東官軍被檄輿疾不以勤辭授知華容縣屬歲歉寬禁緩責勞徠賑卹全活甚衆縣有黃洋渡雨潦時至冒其旁田溢爲巨浸君問知其弊乃發卒隄築延數百丈仍歲大熟民則歌呼曰德我者徐公平由是相與名曰徐公隄云均編籍之役置平糴倉治狀稱最入爲南京戶部主事改工部分司儀真丁母憂服除補南京刑部陞員外郎郎中君治職勤敏奮欲有爲操憲任法里中舊故請謁拒閉強明自信者也然擢貳浙藩未幾輒告罷嗟乎遇合興廢不可違於命蓋久矣况持獨特難合

之見以居群觀儔輩之地雖慎履矜行猶難之世寧
謂君爲同列所中傷或置懟愠其間豈知命之謂哉
君去官家居益貧然不以屑意時集名雋彈碁賦詩
噱衍竟日未卒數日猶然忽告君被疾遽歿遠近歎
息咨閔焉其卒之日嘉靖三年四月某日也距生景
泰庚午年七十有五徐氏蘇人入國初爲江寧人曾
祖諱朴祖諱本父諱溥皆弗仕父以君故封刑部員
外郎娶某氏生子四人忠道忠謀忠爵忠誨女適士
人林陸孫男女各三人君善於爲文尤喜作歌詩所
存有石林藁若干卷是年十月某日墓于某山祖塋

之次太宰建安楊公謂嵩曰信之吾同年友也于浙
又嘗爲僚信之直厚而簡易不爲城府交久能敬仕
而才惜弗究其施也其卒吾無以慰其孤惟塋有石
將子是託焉明日諸孤奉通政叅議黎君狀以至申
公命乃銘詞曰

車堅御良周道孔夷孰遏孰擠而蹶其馳嗟乎徐君
委順何尤太宰篤舊子闡厥幽

贈奉政大夫浙江按察司僉事朱公墓誌銘

贈奉政大夫浙江按察僉事朱公今巡撫湖廣都御
史克諧之父也奉政公以正德辛未三月二十日塋

宅東之先塋十有七年矣嘉靖丁亥十二月十八日
都憲自河南叅政還遷墓于南昌廖方山之原啓夫
人馬氏之壙合而窆焉禮也至是都憲告予曰先親
之不幸不肖孤禍之也不肖守官不良致蹈禍責生
不得榮養其亡也囊無銖金篋無匹帛以歛嗚呼其
可哀也惟是塋未有銘非敢緩蓋有待也茲願得子
銘追納諸壙中庶幾以慰吾親於地下以塞吾悲嗚
哀其詞諾焉蓋都憲於正德間以選爲御史舉職無
所避忤逆瑾意勒停家居怒猶未釋復責輸邊粟數
百石當是時顛沛播越甚矣夫人聞報憂悸遂至大

故奉政公謀鬻貨以給其費雖勞瘁窮阨而不以咎其子曰是道當然也及瑾誅詔起都憲于家而奉政公不祿矣嗟夫居位盡職仕者當然也自都憲嬰瑾之禍爲善者懼矣及起官郎署歷藩臬聲績懋著陟今官大顯于時誥書追榮其親然後論者曰履正終吉天於善人無不報而固有遲速焉故予於書公之墓也首著其事如此以爲世勸而後叙次其世而系以銘公諱層字大霄進賢朱坊里人也宋德祐時諱雲字德敏者無嗣以女弟之子豐城袁氏敬叔爲嗣今朱姓敬叔之後也四傳至國初諱夢炎字仲雅者

仕至禮部尚書從弟舜字仲韶以明經舉本縣儒學訓導伯仲聯美家有廣庭植桂二株人號雙桂朱氏訓導生子文宏文宏二子次曰繼初繼初生孔寬公之父也公蓄德厲行稱鄉里善士夫人協力儉勤植其家公生年月日享年七十又六夫人前卒戊辰冬十二月七日年七十子二人長即都憲名廷聲克諧字也次廷用孫男璽珏璇璣珊珍琮曾孫男七尚幼云銘曰

朱世大家顯自尚書入座奮庸以有令譽衣冠之傳徽久弗嗣爰復其初暨公有子權疆所忌夙與旣逢

教以義忠曷怨曷恫屯艱榮觀物理相紹孰知公榮
乃在身後 皇有錫命秩號賁幽昭德琢辭以勵好
修

奉政大夫福建按察司僉事伍公遷墓誌

公卒且葬二十年矣是惟正德庚辰之歲子湘濡視
地於里歐源江鳳山下謀改葬冬十有一月壬申乃
葬乃奉書加幣告于太史氏嵩曰先公嗣德象賢實
大有家爲孝子涖官有惠政爲良守長有捍賊功爲
名監司維是遷厝有誌敢以請惟伍氏遠有代序自
臨清丞諱洪者國初進士公之高祖也曾祖諱綸祖

諱冕仕至樂清令贈監察御史樂清生二子長封員
外郎諱體祥次御史諱驥公之考也公諱希閔字仲
孝舉進士釋褐得隨州守繇隨州拜福建按察僉事
奉勅專駐上杭上杭者御史公所嘗建功之地也蓋
天順間有寇起上杭御史時按閩督師討平之染瘴
疴輿疾還京歿朝廷命立祠置祭賜額褒忠至成化
間杭復有寇劉昂起攻城劫獄江廣按壤爲之動搖
省臣合請廷議增設兵備憲臣往治吏部以公名上
遂拜焉公至謂祠而後臨政其爲孝子以此隨湖廣
大州也然民罕土著多遠方商販朋比爲姦有猾商

欲奪鄰賈財得正者毆斃之以訟賈賈不能辨將誣服公坐猾商而賈獲免富室嫠婦無子其所贅婿與夫之兄子夜入室殺嫠婦橐其財而詐以盜訴公疑非盜詰其情得同謀誅之早勞民多潰散公撫字有方流亡存復生齒日繁其里戶二曰歸仁歸化者公所增也其爲良守長以此劉寇之發連結武平永定衆至十萬議者欲殲三邑公至則力止之以討賊自任乃首務招服放免者以千數渠魁投見勞以酒食俾擒賊自効立二團管招撫管從者居之以散其黨其驍鷲弗下者廼擄集擒之未幾漳寇溫文進又起

公親統精銳無道倅至一鼓平之分巡汀漳詢民瘼
剷蠹弊斥貪墨理冤抑禁賭博風采整肅當道屢疏
薦杭人肖公像即褒忠之後堂祠焉其爲名監司以
此公丁繼母憂還南禪巡撫汀贛都御史金公澤言
上杭自公去嗣職者不勝任桴鼓數起請還公舊治
詔如金公言於是公在杭凡十有二年每給由輒奏
留之最後以地方告靖得行過家即引疾乞休矣公
少與從兄方伯公孟賢並稱穎異業春秋有名其所
著訂學者傳以爲式既歸構別墅筮橋時方伯亦謝
政觴集怡怡如也其生正統丁巳九月二十六日其

卒弘治己未六月二十三日年六十有三夫人王氏
有淑德子男二曰湘濡也銘曰

伍氏大姓顯人世多御史暨公父子甲科烈烈御史
按治于閩披攘大盜義聲以振 帝曰忠哉捍患勤
事杭土之南作廟攸祀後二十年公繼其來豸冠繡
服以涖丘臺行臺嚴嚴實通公祠攝事致謁庸謹孝
思革其劬勩綏以靜治卓緒殊聞公考是似公昔戾
止邦人入寧公之歸矣桴鼓數興材之具宜而弗遠
至位止于斯惟命之制公歿既久遷墓在茲惟名弗
斁乃刻銘詩

南京守備晏公墓誌銘

嘉靖甲午六月十有二日南京守備司禮太監晏公卒于位年七十有二公性恬約被服儒素非賓會食不重味一室蕭然圖史外無他玩好歿之日幾不能殮衾櫬敝䟽取足歛形已矣留都公卿百執事下逮閭閻卒伍之微咨美悼歎之弗置嗟乎賢矣公諱宏字約之其先楚人也幼入禁庭侍 孝宗皇帝於春宮弘治初以舊勞累陞至太監賜蟒衣玉帶內府乘馬雅善書法 孝皇特賜端硯以寵異之勅督京通倉儲菑革積弊關節弗入人目爲晏御史 孝皇賓

天公悲號孺慕奏乞司香

奉陵居三年遂乞養疾

杜門越十有三年

今上龍飛首起公鎮守陝西召

對便殿玉音勞遣之公既至鎮務以德惠拊循其人
興墜補弊不遺餘力貶損騶御厚餼取給朝夕倣古
義倉意置餘廩以贍貧乏尤重文教崇飭先聖及武
成之廟增補通鑑綱目小學諸書刻梓以傳治績超
美 天子賜敕嘉獎擢南京司禮太監俾領守備則
雅操彌勵一鎮以靜數以老疾求代溫詔慰留旋召
入典東廠蓋 上意睠注方置看密而公已病不良
于行矣初公失怙恃莫省所在既貴悲思營虛塚具

衣冠以葬疾革戒家人以賜殯殉蓋其忠孝大節也
此於是 上聞賜諭祭詔有司給驛歸公之喪葬都
城章華村其孫英哀泣請銘於留都諸大夫諸大夫
合詞曰司禮行應銘銘必得史氏乃以屬嵩嵩攷前
史闡尹氏若景監繆賢史游呂強之儔皆以懷謹納
忠有所補益名焯焯在史冊乃今有忠公靜廉守職
奉法如晏公者是可使之無傳也哉銘曰

繫古宮卿房闈是職筦執要華沿代靡極于惠于威
叢逞類殖嗟惟司禮廉靜方直處潤弗膏蹈躬允飭
有赫 堯明皇鑒如日昇枉遂良起公遺佚休命肅

將所至宣力三輔懷仁舊京用輯室有餘編囊無羨
積美軼往賢動幾軌則壽考令終矢言報國 帝聞
其咨輿情孔惻章華之村爰卜窆窆我銘曷從惟以
書德令譽弗諉來者斯式

漢陽知府馬公墓誌銘

漢陽知府致仕馬公諱輿字良載正德庚辰閏八月
二十六日卒明年二月十九日葬堰川西山之原適
予北上道嘉興其季弟輅從子郡學生淮奉狀泣拜
請銘嘉守徐侯子謙亦爲之請曰此邦之長者也願
無靳於銘予諾焉從其家得公爲御史時遺疏而積

之當孝皇臨御時崇獎言職公感奮自効多所譴劾
糾劾權倖謬謬無少避忤犯天津陳六事言甚剴切
上皆嘉納焉兩廣都御史秦紘劾總兵柳景不法
事景遂誣紘以自逭朝廷貸景而罷紘官公率同列
疏景賊濫貽害邊民紘爲風憲大臣明正典章分所
當然其忠所宜獎乃被譴逐其何以慰邊徼人心而
風厲士大夫 上悟置其事而紘後擢爲戶部尚書
南京守備內臣驕恣不法鑿石聚寶山之陽公按覈
其罪嘗詰捕徼池按江北屯田監權龍江關風采茂
著時稱之曰才御史云公生而超異器宇宏偉舉成

化丙午鄉薦丁未登進士會 憲廟升遐奉詔採脩
江南實錄還授南京山西道監察御史擢知南陽府
調知漢陽未幾以親老乞休論者謂公可大屬乃早
退弗究於用豈其命耶平居憂先天下每見時艱輒
歎息不置閭閻利弊力白郡縣罷行之長厚和易雖
接幼賤假以色辭覲德飲醇者弗忍欺焉其生正統
戊辰十月某日年七十有三元配沈氏贈孺人繼沈
氏貞靜有至性公歿後悲慕晨夕哭不絕聲後八日
自經死公無嗣今爲嗣者仲弟翰之次子坤也馬氏
其先蘇州人公之祖諱榮始遷嘉興故今爲嘉興人

考諱驤封監察御史妣葉氏封孺人銘曰

馬侯振振遭帝聖仁正色危言直道以信載其方端
弗毀于素漢濱南陽竟與時忤退處而休孰怨以尤
順正歸全乃閔茲丘

霸州知州郭君墓誌銘

君諱坤字崇載姓郭氏裔出唐節度使汾陽王世家
太原十世祖思始遷高平乃人稱高平郭氏云曾祖
諱欽封監察御史祖諱質河南光州知州考諱定進
士歷知通鄭邳三州事所至舉其職娶邢氏生君君
少刻志問學領弘治己酉鄉薦任陝西藍田知縣其

民素悍且侈君治悍以法易侈以儉俗稍稍近古宿
豪大猾畏君如神明咸遁走境外治以最聞陞霸州
知州州畿輔近地多權貴人君鋤梗擿伏弗少貸其
在監在霸並遭災饑祈禱輒應發廩賑貸二方之人
德之大盜劉七起境內勢甚猖獗君單騎抵賊所開
陳禍福反復懇至賊感泣惶恐約且解散聞者曰是
果分陽裔邪會逆豎索賄于賊激之南下攻屠城邑
遠近騷然向使君之謀不撓即禍當不至此烈也有
權璫者奪民田君按以法或曰彼且銜公柰何曰吏
以庇民乃殃民以自庇邪執不變權璫者竟失田君

亦竟爲璉所中罷去家居不問世事足不履公府日
與所知觴詠自娛而已享年六十有二以嘉靖丙戌
正月廿有九日卒後十有一年以子璽在諫議賜
誥進階奉直大夫配王氏封太宜人當君之存也太
宜人相以儉德故君雖貧而若裕其後撫二子教以
義方故君雖沒而益振稱賢配焉後君十有九年以
甲辰六月四日卒于京師官邸享年七十有九子男
二長即璽歷戶科都給事中陞太常少卿掌四夷館
事次璽戶部郎中孫男曰治泰曰治統於是太常奉
太宜人柩西歸將以年月日合葬於君北莊之墓而

請銘於予予聞之語曰有陰德者後必大郭君世爲良吏其治人之澤殆不可縷數然仕皆不甚顯又躋抑以歸乃今太常君伯仲相繼舉進士爲卿大夫喋喋未艾天道豈不邇哉誌而追銘之俾爲善者有勸也銘曰

汾陽之孫其澤尚存高平始遷曰惟太原延德不替洽於後昆以威治霸霸民懷恩方盜始起一言可論及其既猖三軍莫禦吏率自芘罔民之恤君志恤民力犯權敵鋤強樹良厥政屹屹除彼稂莠嘉穀以植光鄭之績歷霸再揚二世親民遺清白芳天降餘孽

厥後乃昌福以考終聞則無疆淑配慈儉後隕同藏
勒珉新阡以永弗亡

卷 第 三 十

鈴山堂集卷第三十一目錄

誌銘

封翰林院檢討郭君墓誌銘

封尚寶司少卿徐君墓誌銘

贈南京工部員外郎葉公墓誌銘

榆次知縣崔公墓誌銘

適齋簡先生墓誌銘

拙齋袁翁墓誌銘

安處士墓表

汪處士墓表

劉處士墓誌銘

鈴山堂集卷第三十一

誌銘上首

明故封翰林院檢討郭君墓誌銘

君諱錦字尚綱姓郭氏南昌豐城人也世居縣西北
十里曲江之上兒時舉止嚴整不肯同群兒戲里中
長者多器之父淇川翁諱俊嘗行賈吳越間致饒裕
以貲授君使習賈君雅不喜賈又不善權子本低昂
歲餘貲貨遽耗請於淇川翁曰此非兒所能願改往
業儒淇川翁許之君於是負篋徒步從師受易又受
春秋已又受尚書精於尚書工爲文詞顧就試有司

連弗利則嘆曰敗於賈困於學命矣夫於是今賡善
君希顏生六齡矣穎異絕倫君感夢有異徵乃又歎
曰吾聞積不厚不發窮不極不通意者其在吾子乎
遂杜門不復就試以尚書授希顏朝夕講辯鉤引穿
貫奧析隱測而希顏克傳其學嘉靖壬午希顏年甫
十四髮黝然垂領而舉于鄉鄉人觀者駭矚盈堵淇
川翁大喜曰夫士惡可弗擇所習邪吾兒果成其志
又十年希顏登進士入翰林爲庶吉士授國史檢討
又二年皇太子生君以恩例受封如希顏官又三年
冊立東宮希顏被簡陞春坊右贊善仍兼檢討君

獨善諄諄勉以效忠蓋希顏不獨以文學稱儔輩
其邁往勇特執議侃侃當所自信不少徇于衆嘗折
薛學士祀議及監國議下又獨抗疏以爲不可嗟乎
固可以觀君之爲教矣君素端肅以禮自將所居曲
江介豪族而豪族人嚴重之莫敢有犯平居不干預
官府事獨與親知結里社歲時伏臘會飲盡樂飲雖
多揖讓愈飭蓋其性行如此去歲庚子九月二日君
奄卒于家先是傳君得腹疾飲食頓減希顏悸不自
定謀乞歸養而計已至距生成化甲辰八月八日享
年五十有七曾祖諱原德祖諱惟信皆有隱德配雷

氏封孺人子男四長即希顏次希曾希思俱縣學生
次希孟早夭女一適縣學生杜遷善孫男二汝寧汝
成希顏解官歸將上某年月日於某山之原以葬而
匍匐持其友閔中允所著狀詣予請銘以饒諸石夫
以希顏之材之地崇顯可指取有而君則溘然不少
待然其後也其所克享者又惡可涯涘哉是故不宜
無銘也銘曰

業賈易儒既宦而通操誦致羸利孰與豐山川出雲
膚寸晦蒙厥施靈霽瀾于太空君十用遇不必自躬
式穀貽嗣維以教忠湛恩遐祿未見其終尚焯奇蹟

銘告無窮

封奉直大夫尚寶司少卿徐君墓誌銘

君姓徐氏諱元相字弘弼常州宜興人少師兼太子
太師吏部尚書華蓋殿大學士贈太師特進左柱國
文靖公之子也上世鍾離人南唐時九世祖諱綱者
尉於吳愛宜興山水之勝遂家焉高祖諱福封戶部
郎中曾祖諱鑑永樂間知瓊州府事有惠政民立祠
祀之祖諱琳隱德不仕自戶部公三世俱累贈少傅
兼太子太傅戶部尚書謹身殿大學士祖妣妣俱一
品夫人君少則穎敏日能記千言爲文出句輒有奇

氣而限於足疾因棄學業守家事幹理井井有條文靖公既入相以俸餘建家廟置祭器及爲義田以贍宗族君將事承志有助焉歲歉君發粟以賑貧疫死無歸者具衣棺殯之稱貸弗能償者輒焚其券姻族賓友遠方寒士賴君助者甚衆禁飭童僕毋作非法公喜曰是吾志矣公在任雖遠必時致鮮食未致不敢嘗晚年釋去家事放志林壑風日晴和雪月澄朗放舟携壺隨興所至手爲丹青以寄其適足跡不入城府二十餘年預營壽藏於紫雲山垣宇幽僻超然有塵外之觀焉朔望謁家廟畢坐中庭諭子孫

不替先聞配將宜人偕老相敬如賓宜人先卒君無
他侍嫠子文燦由祖恩官奉直大夫尚寶司少卿君
受封如其官然仕服不時御既年八秩有司奉恩例
具冠服粟帛貽君君曰封典可致耄期難逢乃始御
仕服論者謂君行不易方性不矯俗樂不失真動不
違禮蓋實錄云君生天順辛巳正月四日距卒嘉靖
壬寅八月二十八日享壽八十有二子男六長即文
燦次文煒錦衣千戶出爲季叔元槩後次文炯廣宗
知縣次文輝上林苑監丞次文煒鴻臚通事次文炫
早卒女三長適濟源縣丞沈誥次適成國公榮康朱

公今太僕公希忠之姪也少通經學長於秀言然厚
陳道成孫男十四人曾孫男六將葬太保朱公曰外
氏世載令德法宜得銘以彰示永禩乃自述狀而屬
銘于予銘曰

徐自遷宜毓靈秀令德起家自瓊守餘慶迓祥發而
厚篤生文靖相明后功在社稷昌厥後飭躬訓禮
來庭授義洽宗姻達賓友出德方隆復遐壽諸昆蟄
蟄登章綬紫雲佳城何永久饒石勒詞示弗朽

贈奉直大夫南京工部員外郎葉公遷墓誌

嘉靖壬午之秋南京工部員外郎葉君鵠以詔例得

贈其考石山翁如已官階奉直大夫距公之卒且葬
七年矣工部視地于邑來蘇鄉之吳塘謀改葬壤厚
流匯卜者曰祥癸未五月二十一日葬焉既乃礱石
刻制詞樹墓上而屬蒿誌其世系里居事行以昭示
永久誌曰公諱瓊字廷瑞姓葉氏上饒羊石里人曾
祖諱張福祖諱清父諱志顯娶龔氏生三子伯明德
早世仲珠仕爲永春縣令季即公也端直信厚篤行
友睦兄卒撫姪恩甚嘗割地以益其居民鬻產者必
厚償其值曰彼以貧故也建橋濟涉發儲粟賑災其
貧而弗能償者未嘗問也公以上世皆弗仕永春仕

亦弗顯故每督諸子以學禮經師于塾姻族子弟招致館穀費自已出配丁氏有賢行能助公所爲由是卒見其子舉進士授浦城令擢六安州皆迎食其祿鵠脩職有聞率公之教然論者以公積德累善宜有子而非特其教之力也性不善飲雅好賓客燕必盡懽危坐終日不以爲勞既老而精神愈固正德丙子十一月十二日卒于六安之官舍年七十有三生正統甲子十二月二十三日初配丁氏繼配以周氏子五人長鵬次鵠即工部次麒次麟次鴻女二人孫男十人欽鏞鏐鏌鏞金鈞曾孫二人工部再起守

州以至今官而子鏜鉅俱幼有異質績學大成業業
將日盛公之慶未艾也銘曰

葉系石林肇居弋陽再徙羊石代晦其光積厚發閎
初音終侈簪笏升朝繫公有子子有祿食親則享之
人曰好德公實宜之公歸旣完公澤靡竟雲仍琬琰
以篤其慶榮光下燭錫命自天峙此銘詩爲告新阡
榆次知縣崔公墓誌銘

榆次公旣卒且塋二十有八年矣子三畏爲南京刑
科給事中而奉其母太孺人楊來居無何太孺人卒
予往吊給事祖括號慟拜且祈曰先君之卒也三畏

幼愚且賤銘誌未備茲以母喪還將卜日合塋於榆次公墓惟先生哀而賜之銘予教國學於給事有一日之雅弗克辭按狀榆次公諱岑字萬峯姓崔氏家世蠡人曾祖顯祖甫儀皆弗仕考諱翔舉鄉薦爲舍山儒學教諭公承家學繼舉于鄉遊太學大司成稱其文以示多士士從遊者衆居父喪墓廬講學不倦數上春官弗第就選爲榆次令邑大健訟難治公勸裁無留事以其餘力飭學校公署圯敝者一新之督諸生程課親爲講說訓誘學者日起征虜大將軍師出境上車徒數萬張甚虓虎公從容酬給芻糗資糈

接濟有方闔境倚以爲安治榆五年惠立威振旁近
諸邑罔不賢榆次公者然公性介特英邁自負以蹇
直事上官上官即非禮遇之不爲屈既有違言則慨
然歎曰是不可以已耶即日謝事歸蠶其後榆次人
勒石作去思碑又述公治績彙爲錄傳焉公卒於正
德丁卯九月二十四日享年五十有二子長三聘
次三畏鄉舉第五人進士甲科出宰大谷考最擢今
官授勅命贈公文林郎封母爲太孺人太孺人溫慎
儉勤克稱內助卒于嘉靖甲午八月三日享年八十
孫男四孔登孔躋孔升孔愚女三適某某孫女三亦

各許聘士族銘曰

崔世廸德業治經博曰職訓端範刑公生剛明思奮
升再仕弗耀後乃興爰有苞羽翔 帝庭如源斯瀦
流澄澹銘勒玄石揚芬馨

適齋簡先生墓誌銘

適齋簡先生今大理丞騰芳之父也大理爲御史按
汴擢今官念先生年高過家欲留侍先生屢趣之曰
往哉共職圖報無以我爲念也於是大理不得已乃
行獨居京師嘗鬱鬱增疾乃今計至先生之卒嘉靖
九年五月三日也年七十有七大理解官歸將以年

月日葬某山之原而屬嵩誌諸墓嵩姻也其奚以辭
謹按先生諱成字緝典以字行臨江新喻人曾祖諱
某祖諱顯漢考諱應夢皆隱德弗仕先生少穎異過
人弱冠卽爲鄉塾弟子師端嚴謹重里中人爭延致
之久之弗樂羈束棄去携貲一涉荆吳之境間遇奇
勝篇詠逸發已而輒復還曰適意而已豈必窮所至
爲快哉先生嘗自謂少無他兄弟未卒所業結屋東
園督諸子績學其間外檻兩芝繼生人以爲瑞大理
夙稟英特造詣閎肆先生固心偉之曰是當成吾志
已而大理果領鄉薦報至衆賀芝不虛生先生曰未

也已而舉進士宰石首黃岡二縣已而召爲臺有勲
封之典先生皆預策之如所期焉初大理令石首迎
先生就養弗許語之曰案已行端恕人量廣審思事
得作善福興茲而有能爲養大矣故大理所歷有善
狀以清白著稱超副九列爲時能臣先生之教也先
生自奉甚樸服無華章室靡騰侍至族里周恤加厚
撫外氏之孤匡厥孱墮賴有公焉元配黎氏同邑步
溪望族有賢行封孺人繼而周氏子長即大理霄騰
芳也次縣學生霖次秋芳女適教周翰先生博通書
史旁及山經地志陰陽奉卜之學善以時日卦例定

太史歐君崇一所著狀皆合予乃爲銘曰

惟意之爲適匪以好遊惟義之爲訓匪祿養是謀嗟
若人兮好脩其藏茲丘兮銘以闡其幽

拙齋袁翁墓誌銘

分宜異時其俗朴其人淳龐故多壽考拙齋翁雖既
老出入里門必步鄉飲禮請不數赴優老恩例受冠
帶非其好被服布素鮮綺不肯一御子孫不能強也
嘉靖乙酉正月四日以壽終年八十有五云翁諱璋
字宗鼎姓袁氏其先自寧州西山徙分宜入國朝族

始大號車田袁氏高祖諱子芳生彥明彥明生象賢
領永樂丁酉鄉薦象賢生正理翁父也翁生而敦重
不逐群兒戲十歲喪母鞠于祖母夏侯氏夏嘗語人
曰昌吾家者其此子乎君外樸而中慧遇事剴折有
條善治生身致殷富雖歲居月積而施舍裒益相爲
流通識度恢濶銖兩不數數較然計所獲乃倍他人
數數較銖兩者少時父遣之治粟于莊令取遺利自
殖翁卒事無纖毫私曰吾兄弟何可背之人有急難
周之恐後里中貧窶待以舉火齒骼暴露掩塋尤衆
兄子二人早世翁盡力經紀其喪而撫其遺孤皆有

立其篤於義如此然匪以學蓋天質也初娶夏氏並有婦德子一人曰怡太學生予少則與太學君同邑校因始識翁翁以冢孫應樞求婚于予先祖尚書公曰袁翁令德長者可弗諾諸即主聘焉應樞今選貢禮部孫男六人次應蘭應蕙應槐俱邑學生次應桐應苓女適陳相黃乾曾孫男四銳鏜欽鎬於是翁塋縣西昌田墓木拱矣予嘗許爲銘久未執筆也應樞屢奉父命以請嗟乎德人云亡不可作矣向之朴者日以澆靡叙次翁事而系以銘庶幾以識予之慨慕云爾銘曰

世競利以讐兮吾跡羸而弗取世徇侈以怵兮蹇獨
安此素履嗟哉拙翁敦樸自躬如璞未斲有美在中
厥丘崇隆厥木蒼葱厥來多祉施于孫子

安處士墓表

江之南有遺佚之士常州無錫堠村里安君嘉靖十
三年閏二月癸丑終于里第明年二月乙酉葬于膠
山塋之日四方來觀駢軫接轡溢于塗川子裕州大
夫遣使告哀乞辭留都於是琢石紀德揭于新阡云
君諱國字民泰其先黃姓高祖叔英來繼于安明善
氏則是族之本也父諱祚娶司馬氏溫國文正公之

裔是生君君體質豐碩儀止詳華開明之識發乎簪
卅年弱冠爲州閭所服兼覽群籍靡不尋暢恭已飭
行愛衆親仁微密儉清晦而不耀由是月旦高於鄉
評究其所立可謂好禮尚志偉出不群者矣君初承
世基夙號殷裕既自崛起大振原田萑萑困倉義義
錫川之稼如茨如雲父歿後不數年富侔封君矣然
君志軌先民而不規近俗之陋氣凌物表而希播百
代之風是故知貴勤以食力也故考林澤省農時佃
夫穡人出不息之米以相其役知捐財以植義也故
恤惻嫠賑窮乏焚券盈庭蠲租二萬石養無告之老

知禮義以阜俗也故闢門延師號曰義塾以教里之子弟知景行以崇哲也故飭李忠定張中丞之祠知利濟以廣惠也故甃通商之磴鑿既旱之渠發濬塘之粟知篤親以尚厚也故撫猶子之孤賑舅氏之落賙業師之塋其它義行不可殫述初尚書西蜀李公巡撫東南講求水利時濬白茆塘方牽作舍之謀屢休盈庭之議及得君指畫方畧舉措合宜勸懲有法民勇趨事迄于成功公大喜恨相見之晚寇發海島中丞伍公延君至幕下策多忤事平伍公言于朝爰有銀牌之錫君雅負經略志存拯人俾獲用世厥

所建立又豈少哉君嘗言曰昔人足蹟半天下而
不出環堵亦吳人已爾乃北遊燕薊攀銀山望天壽
抵居庸觀日岱宗視禮乳林已而泛大江躡匡廬循
襄漢以憩于武當又道荆溪登龍池涉震澤窮搜天
目諸山乃東至海上掠錢塘探禹穴窺天台鴈宕而
還遊各有圖紀之詩君所爲詩即事暢懷高遠清逸
自成一家言然則遺物超俗可觀於斯矣君譽聞遐
邇所至達官重卿虛館授粲文人騷士雲附景從或
以爲江南大豪不知深慈樂易敬讓以得也方將攀
逸駕於洪厓騁遐轡於關洛凌宇宙以高挹跨烟雲

以長邀享齡五十有四遽病而卒聞者慨惜焉君有
子七人如山舉進士甲科入選中秘出領方州如磐
如石如京如同如陵如某皆競爽雋茂過庭受試學
有造就予以歲丙戌典教國庠如山來立館下溫敏
而有文雖長膏統不見盈侈之色雍雍恂恂有足異
也因撫之而嘆曰蘭主謝庭玉產崑岡其有自乎已
而觀故相遂翁大宰龍濟廖公尚書二泉邵公鳳山
秦公往與君相善咸有論撰炳炳可考於是慨然痛
君以遠志卓行溘然淪亡微美弗述後將曷傳緬懷
高蹤式表幽隧用貽于後之有識者云爾其銘曰

於惟安君稟氣淑靈含和匿耀避迹巖扃耽藝樂術
貫究典墳振履雲嶽弭棹蘭津坡山之幽桂樹叢生
婆娑謳吟遺忽世纓鳴瑟在御談扇猶新鴻儀零謝
覲德無因懷哉永思刻石紀文身歿名流億載永芬

汪處士墓表

汪處士歙州潛川人也家世以貲雄曾祖彥實祖仕
賢考承德高尚弗仕皆以義聞處士益振其先君之
業能不私其財以賙鄉里歲饑所活甚衆嘗製泉著
之衣千襲以散施貧民夷佛嶺之道鑿石築亭以便
行者率族衆建祠祀先多行義事而罔德色潛川之

人稱焉蚤年商遊齊魯有鬻息女者處士以金買之
既而母子相携慟哭不忍去處士惻然歸其女而置
金不問民饑無所得食則赴水自湛處士亟募篙工
拏舟拯之義聲震一時齊魯之人稱之如潛川焉處
士享年八十有四終于家其遠適筑獨窮窶之人皆
曰汪公亡吾無所告依而生訟爭弗決者曰安得汪
公在一言即渙然釋矣其與慕弗忘如此處士諱相
字以輔別號澹菴生宣德乙卯十一月三十日其卒
以正德戊寅十二月十九日配張氏有賢行二子曰
柳曰櫛孫男四文柯太學生文珣文瑄文玠俱郡學

生予往讀少傳王文恪公所著澹菴說謂處士春秋
八十而有童孺之色曰近古之息心人也旣已得翁
之爲人同寅潘公歎人也又亟道翁善弗置嗚呼處
士以一布衣而能施澤於人假令有官秩膺民社寄
其不能憂人之憂澤之所及不尤廣耶而世有官秩
膺民社寄者視民之窮非惟弗加恤又從而厲焉則
如處士者其可不表以爲後勸耶系之銘曰

汪自越國肇封于唐烈在王室德庇其鄉繇宋歷元
鄭火嚴祀璽勅金書昭于世世惟公之姓碩大延蕃
其來者遠如流有源孰散其藏而弗自有載其休聲

以遺永久惟公懋德寔大其門壽豈令終訖訖子孫
倬哉潛川百室攸萃爲善有後惟汪公是視

耕隱劉處士墓誌銘

處士諱進字景暉劉姓本泰和株林與前吏部尚書
劉崧同出南唐學士某之裔祖世明徙家萬安石洲
遂稱爲石洲劉氏六傳曰明德者仕元爲廉訪司知
事於處士爲曾祖祖諱彥達以易經魁江西鄉試仕
終府學教授父諱善慶正統己未進士官至刑部員
外郎娶郭氏生君兄弟三人而君最季髮未植即失
父母獨與二兄居父吏廉寡遺貲君推財聽兄無所

校兄臬仕爲桂林府同知君念家督在已乃不爲翼
子學學爲詩甚溺探蒐古籍名家句解節會久之放
意敷詞往往不落世調可覽誦又喜讀史研核今往
興衰治亂之故間出已見置論褒損且慕許由善卷
嚴陵之爲人淪淪寓遐心焉劉氏世以節縮築富君
尤朴嗇自善故產著益豐然顧義而尚儉伎其女兄
有子曰蕭暄少孤危君取鞠於家爲置婚還其奪業
竟得存女兄後性喜客隨具治食爲娛酒酣輒誦先
世遺文召諸孫及他子弟聽之自傷早孤遇祖考愍
忌必變服泣奠絕弗修浮屠事厭風水陰陽拘忌之

說每日郭景純乃不自保其躬塋經何可信也世謂
篤論平生絕跡城府終身不註吏議自號耕隱人亦
呼爲耕隱先生云君素鮮疾病嘉靖丁酉九月三日
微不適遂終於正寢生景泰甲戌年八十有四配蕭
氏繼配顏氏子男三長椿早世仲梅青田縣學訓導
季杞封文林郎龍溪知縣孫男五長天球次天授舉
進士初令龍溪入爲刑部主事次天賜天職天簡將
塋刑部以文林公之命具處士行實乞予銘其言曰
先祖有善弗揚不孝無是而稱之之謂誣不肖不敢
陷於斯二者其友陳進士昌積稱引克合可徵焉之

錄曰

苗也可以秉穫潛也可以遠注揭揭處士植義務滋
有舊鼎施吾見其孫執憲而文是將大其門乎

鈴山堂集卷第三十一